

SIDAPVIA® Film-Coated Tablet

Dapagliflozin/Sitagliptin (10 mg/100 mg)

Apakah yang ada pada risalah ini

1. Apakah kegunaan SIDAPVIA
2. Bagaimana SIDAPVIA berfungsi
3. Sebelum menggunakan SIDAPVIA
4. Cara menggunakan SIDAPVIA
5. Semasa menggunakan SIDAPVIA
6. Kesan-kesan sampingan
7. Cara penyimpanan dan Pelupusan SIDAPVIA
8. Maklumat lanjut
9. Pengilang
10. Pemegang Pendaftaran Produk
11. Tarikh kemaskini RiMUP
12. Nombor siri

Apakah kegunaan SIDAPVIA

SIDAPVIA digunakan bersama diet dan senaman untuk mengawal paras gula dalam darah (glukosa) di kalangan orang dewasa dengan penyakit kencing manis jenis 2.

Penyakit kencing manis jenis 2 adalah keadaan di mana badan anda tidak menghasilkan insulin yang mencukupi dan insulin yang dihasilkan oleh badan anda tidak berfungsi sebagaimana mestinya. Badan anda juga boleh menghasilkan terlalu banyak gula. Apabila ini berlaku, gula (glukosa) berkumpul dalam darah dan boleh menyebabkan masalah perubatan yang serius.

Matlamat utama rawatan penyakit kencing manis jenis 2 adalah untuk mengawal gula dalam darah anda ke paras yang normal. Penurunan dan pengawalan gula dalam darah boleh membantu mencegah atau melambatkan komplikasi diabetes, seperti penyakit jantung, penyakit buah pinggang, kebutaan dan amputasi.

Bagaimana SIDAPVIA berfungsi

SIDAPVIA mengandungi dua bahan aktif, *dapagliflozin* dan *sitagliptin*. *Dapagliflozin* tergolong dalam kategori ubat yang dipanggil perencat SGLT-2 (*Sodium Glucose Cotransporter-2*), dan *sitagliptin* tergolong dalam kategori ubat yang dipanggil perencat DPP-4 (*dipeptidyl peptidase-4 inhibitors*).

Dapagliflozin bersama *sitagliptin* bertindak untuk menurunkan paras gula darah dalam pesakit kencing manis jenis 2.

Sebelum menggunakan SIDAPVIA

- *Bila tidak boleh menggunakan*

Jangan menggunakan SIDAPVIA jika:

- anda ada alahan terhadap *dapagliflozin* atau *sitagliptin*, atau mana-mana bahan-bahan kandungan lain yang disenaraikan di hujung risalah ini.
- Sentiasa semak bahan-bahan kandungan untuk memastikan anda boleh menggunakan ubat ini.

Antara simptom tindak balas alahan mungkin termasuk:

- sesak nafas
- berdehit atau sukar bernafas
- bengkak muka, bibir, lidah atau bahagian-bahagian badan yang lain
- ruam, gatal-gatal atau gegata pada kulit atau
- anda mungkin berasa pitam.

- *Sebelum mula menggunakan SIDAPVIA*

Semak dengan doktor anda jika anda:

- mempunyai sebarang alahan terhadap mana-mana ubat, makanan, pewarna atau pengawet
- anda mempunyai, atau pernah mengalami, mana-mana masalah perubatan berikut:
 - kencing manis jenis 1
 - masalah buah pinggang, hati atau pankreas
 - kerap mendapat jangkitan pada genital (kemaluan) atau saluran kencing (jangkitan pundi kencing, buah pinggang atau salur yang membawa air kencing)
 - penyakit yang akan menyebabkan anda mengalami dehidrasi seperti cirit-birit atau jangkitan yang teruk
 - ketoasidosis diabetik. Ini adalah simptom penyakit kencing manis yang tidak terkawal, di mana bahan yang dipanggil badan keton (*ketone bodies*) berkumpul di dalam darah. Anda mungkin mengalami simptom seperti penurunan berat badan yang cepat, berasa sakit atau kesakitan, sakit perut, rasa dahaga yang lampau, pernafasan yang cepat dan dalam, kekeliruan, keletihan atau rasa ngantuk yang luar biasa, bau yang manis pada nafas anda, rasa manis-manis atau logam dalam mulut anda, atau bau yang berbeza pada air kencing atau peluh anda.
- anda sedang mengambil ubat untuk tekanan darah tinggi atau mengambil pil air (diuretik).
- mengambil ubat-ubat untuk mana-mana penyakit lain.

Doktor anda akan melakukan beberapa ujian untuk fungsi buah

pinggang pada permulaan rawatan dan dengan kerap semasa anda menjalani rawatan.

Semasa rawatan, anda mungkin berisiko mengalami kesan sampingan tertentu. Adalah penting anda memahami risiko ini dan cara memantaunya. Lihat bahagian 'Kesan-kesan sampingan' untuk maklumat tambahan.

Mengandung dan menyusu bayi

Semak dengan doktor anda jika anda mengandung atau merancang untuk mengandung.

SIDAPVIA tidak disyorkan untuk digunakan semasa mengandung. Keselamatan SIDAPVIA di kalangan wanita yang mengandung belum ditentukan. Jika anda mengandung, hentikan pengambilan SIDAPVIA dan bercakap dengan doktor anda dengan segera tentang cara terbaik untuk mengawal paras gula darah anda semasa mengandung.

Berbincang dengan doktor anda jika anda sedang menyusu bayi atau merancang untuk menyusu bayi.

SIDAPVIA tidak boleh digunakan semasa menyusu bayi atau jika anda merancang untuk menyusu bayi. Adalah tidak diketahui sama ada bahan aktif dalam SIDAPVIA akan masuk ke dalam susu ibu. Berbincang dengan doktor anda tentang cara terbaik untuk memberi makan kepada bayi anda jika anda mengambil SIDAPVIA.

Kanak-kanak

SIDAPVIA tidak disyorkan untuk digunakan dalam kanak-kanak.

Ia tidak pernah dikaji dalam kanak-kanak di bawah umur 18 tahun.

- Jika mengambil ubat-ubat lain

Beritahu doktor atau ahli farmasi anda jika anda sedang mengambil ubat-ubat lain, termasuk ubat, vitamin atau suplemen yang anda peroleh tanpa preskripsi daripada farmasi, pasar raya atau kedai makanan kesihatan anda.

Buangkan mana-mana ubat lain yang mengandungi dapagliflozin atau sitagliptin yang mungkin telah diberikan oleh doktor anda pada masa yang lepas dan yang anda mungkin masih simpan.

SIDAPVIA mengandungi dapagliflozin dan sitagliptin. Jika anda mempunyai lebih daripada satu ubat yang mengandungi dapagliflozin atau sitagliptin, anda mungkin terambil terlalu banyak (terlebih dos) secara tidak sengaja.

Tanya doktor atau ahli farmasi anda jika anda tidak pasti sama ada anda mempunyai sebarang ubat lain yang mengandungi dapagliflozin atau sitagliptin.

Dapagliflozin dan sitagliptin dijual secara berasingan sebagai FORXIGA dan JANUVIA di Malaysia. Doktor atau ahli farmasi anda akan mengetahui ubat lain yang juga mengandungi dapagliflozin dan sitagliptin dan boleh menasihati anda tentang apa yang perlu dilakukan.

Beritahu doktor atau ahli farmasi anda jika anda mengambil mana-mana ubat yang berikut:

- *sulfonylurea*
- insulin.

Terutamanya memberitahu doktor anda:

- jika anda mengambil litium kerana SIDAPVIA boleh mengurangkan kandungan litium dalam darah anda.

SIDAPVIA mungkin mengganggu atau menjejaskan cara ubat-ubat ini bertindak, atau ubat-ubat ini boleh

menjejaskan cara SIDAPVIA bertindak. Doktor anda mungkin perlu melaraskan dos ubat-ubat ini atau menukar kepada ubat lain.

Semak dengan doktor atau ahli farmasi anda jika anda tidak pasti tentang ubat, vitamin atau suplemen yang anda ambil dan jika ini menjejaskan SIDAPVIA.

Cara menggunakan SIDAPVIA

Ikuti semua arahan yang diberikan oleh doktor atau ahli farmasi kepada anda dengan berhati-hati.

Ia mungkin berbeza daripada maklumat yang terkandung dalam risalah ini.

Jika anda tidak memahami arahan pada pek ubat, tanya doktor atau ahli farmasi anda untuk mendapatkan bantuan.

- Telan tablet SIDAPVIA anda sepenuhnya dengan segelas air penuh.

- Berapa banyak harus digunakan

- Dos SIDAPVIA adalah satu tablet sekali sehari.

- Bila perlu digunakan

- SIDAPVIA perlu diambil pada masa yang lebih kurang sama pada setiap hari. Mengambil tablet anda pada masa yang sama setiap hari akan memberi kesan terbaik. Ia juga akan membantu anda mengingat masa untuk mengambil tablet.
- Tablet SIDAPVIA boleh diambil sebelum atau selepas makan.

- Berapa lama perlu digunakan

- Teruskan mengambil SIDAPVIA selagi diarahkan

oleh doktor anda. Pastikan anda menyimpan bekalan SIDAPVIA yang secukupnya supaya tidak kehabisan pada hujung minggu dan hari cuti.

SIDAPVIA dapat membantu mengawal penyakit anda, tetapi tidak menyembuhkannya. Oleh itu, anda mesti mengambil SIDAPVIA setiap hari.

- Jika terlupa menggunakan

SIDAPVIA harus digunakan secara tetap pada masa yang sama setiap hari. Jika anda terlepas dos anda pada masa yang biasa, ambil ia sebaik sahaja anda ingat, dan kemudian ambil dos seterusnya pada masa yang biasa.

Jika hampir sampai masa untuk dos anda yang seterusnya, langkau dos yang terlepas dan ambil dos yang seterusnya pada masa yang biasa.

Jangan ambil dos berganda untuk menggantikan dos yang terlepas.

- Jika mengguna berlebihan (terlebi dos)

Jika anda berfikir anda telah menggunakan terlalu banyak SIDAPVIA daripada yang diperlukan, anda mungkin memerlukan rawatan perubatan dengan segera.

Anda hendaklah segera:

- hubungi doktor anda, atau
- pergi ke Jabatan Kecemasan di hospital terdekat.

Anda harus melakukan ini walaupun tiada tanda-tanda ketidakselesaan atau keracunan.

Semasa menggunakan SIDAPVIA

- Perkara yang perlu dilakukan

Jika anda mula mengambil sebarang ubat baharu, beritahu doktor, doktor gigi atau ahli farmasi anda bahawa anda sedang mengambil SIDAPVIA.

Pastikan anda, rakan anda, ahli keluarga anda dan rakan sekerja anda boleh mengenali simptom hipoglisemia dan hiperglisemia serta mengetahui cara merawatnya.

Adalah penting untuk anda membuat pemeriksaan berkala dengan doktor atau pusat diabetes anda.

Jika anda menghidap penyakit kencing manis, adalah penting untuk anda memeriksa kaki anda dengan kerap dan mematuhi nasihat berkenaan penjagaan kaki yang diberikan oleh doktor anda.

Beritahu doktor anda jika anda mengalami penurunan berat badan yang cepat, berasa sakit atau kesakitan, sakit perut, rasa dahaga yang lampau, pernafasan yang cepat dan dalam, kekeliruan, keletihan atau rasa ngantuk yang luar biasa, bau yang manis pada nafas anda, rasa manis-manis atau logam dalam mulut anda, atau bau yang berbeza pada air kencing atau peluh anda. Simptom-simptom ini berkemungkinan menjadi tanda ketoasidosis diabetik.

Beritahu doktor anda jika anda perlu menjalani pembedahan (termasuk pembedahan gigi) supaya anda boleh membincang bila anda boleh berhenti mengambil SIDAPVIA dan bila anda boleh mula mengambilnya semula.

Jika anda perlu menjalani sebarang ujian perubatan semasa anda mengambil SIDAPVIA, beritahu doktor anda.

SIDAPVIA mungkin menjejaskan keputusan beberapa ujian perubatan.

Lawati doktor anda dengan kerap untuk pemeriksaan.

Doktor anda mungkin melakukan ujian darah untuk memeriksa fungsi buah pinggang, hati, jantung, dan paras kolesterol dan lemak dalam darah anda semasa anda mengambil SIDAPVIA.

Hipoglisemia

SIDAPVIA biasanya tidak menyebabkan hipoglisemia, walaupun anda mungkin mengalaminya jika anda mengambil ubat-ubat lain tertentu, seperti insulin atau *sulfonylurea*.

Hipoglisemia boleh berlaku secara tiba-tiba. Tanda-tanda awal mungkin termasuk:

- lemah, menggeletar atau menggigil
- berpeluh
- ringan kepala, pening, sakit kepala atau kurang tumpuan
- cepat marah, sebak atau menangis
- kelaparan
- kebas di sekitar bibir dan lidah.

Jika tidak dirawat dengan segera, simptom-simptom ini boleh menyebabkan:

- kehilangan koordinasi
- pertuturan yang tidak jelas
- kekeliruan
- sawan atau kehilangan kesedaran.

Jika anda mengalami sebarang simptom hipoglisemia, anda perlu meningkatkan paras gula darah anda dengan segera.

Anda boleh melakukan ini dengan melakukan salah satu daripada yang berikut:

- makan 5 hingga 7 biji jeli (*jelly beans*)

- makan 3 sudu kecil gula atau madu
- minum setengah tin minuman ringan bukan diet
- ambil 2 hingga 3 tablet glukosa pekat

Melainkan anda akan makan hidangan atau snek anda yang seterusnya dalam masa 10 hingga 15 minit, susulkan pemakanan di atas dengan karbohidrat tambahan seperti biskut kosong, buah atau susu.

Pengambilan karbohidrat tambahan ini boleh mengelakkan penurunan paras gula darah anda untuk kali kedua.

Hiperglisemia

Jika anda perasan mana-mana tanda hiperglisemia kembali, hubungi doktor anda dengan segera.

Doktor anda mungkin perlu mempertimbangkan rawatan tambahan atau rawatan lain untuk penyakit kencing manis anda.

Risiko hiperglisemia meningkat dalam keadaan-keadaan berikut:

- penyakit kencing manis yang tidak terkawal
- sakit, jangkitan atau tekanan stres
- terlupa mengambil SIDAPVIA
- mengambil ubat-ubat lain yang tertentu
- tidak cukup senaman
- memakan lebih banyak karbohidrat daripada biasa.

Beritahu doktor anda jika anda:

- jatuh sakit
- mengalami dehidrasi
- cedera
- demam
- mempunyai jangkitan yang teruk
- menjalani pembedahan (termasuk pembedahan gigi).

Paras gula darah anda mungkin menjadi sukar dikawal pada masa ini.

Jika anda hamil semasa mengambil SIDAPVIA, beritahu doktor anda dengan segera.

Ingatkan mana-mana doktor, doktor gigi atau ahli farmasi yang anda lawati bahawa anda menggunakan SIDAPVIA.

- Perkara yang tidak boleh dilakukan

- Jangan berhenti mengambil ubat anda tanpa berbincang dengan doktor anda.
- Jangan ambil SIDAPVIA untuk merawat sebarang masalah perubatan lain melainkan disuruh oleh doktor anda.
- Jangan berikan ubat ini kepada orang lain, walaupun simptom-simptom mereka kelihatan serupa atau mereka mempunyai penyakit yang sama seperti anda.

- Perkara yang perlu diberi perhatian

Memandu atau mengendalikan mesin

Berhati-hati sebelum anda memandu atau menggunakan sebarang mesin atau alatan sehingga anda mengetahui cara SIDAPVIA mempengaruhi anda.

Paras gula darah yang rendah boleh melambatkan masa tindak balas anda dan menjejaskan keupayaan anda untuk memandu atau mengendalikan mesin.

Pastikan anda tahu bagaimana anda bertindak balas terhadap SIDAPVIA sebelum anda memandu kereta, mengendalikan mesin atau melakukan aktiviti lain yang boleh membawa bahaya jika anda pening atau ringan kepala.

Kesan-kesan sampingan

Semua ubat boleh menyebabkan kesan sampingan. Jika anda mengalami sebarang kesan sampingan, kebanyakannya adalah tidak teruk dan sementara. Walau bagaimanapun, beberapa kesan sampingan mungkin memerlukan rawatan perubatan..

Lihat maklumat di bawah dan, jika perlu, tanya doktor atau ahli farmasi anda jika anda mempunyai sebarang soalan lanjut tentang kesan-kesan sampingan.

Kesan sampingan yang kurang serius

- Ruam
- Kerengsaan pada kemaluan yang disebabkan oleh jangkitan genital (kemaluan)
- Sakit kepala
- Ketidakselesaan perut, muntah atau sembelit
- Sakit belakang atau sakit otot atau sakit pada sendi, belakang, lengan atau kaki
- Tanda-tanda jangkitan pada saluran pernafasan termasuk hidung berair, sakit tekak, batuk, sakit di bahagian belakang hidung dan tekak serta ketidakselesaan semasa menelan, sakit kepala, gejala seperti selesema.

Apa harus anda buat

Berbincang dengan doktor anda jika anda mempunyai sebarang kesan sampingan yang kurang serius ini dan ia membimbangkan anda.

Kesan sampingan yang serius

Reaksi alahan:

- Sesak nafas, berdehrit atau kesukaran bernafas yang teruk; kejutan, bengkak muka, bibir, lidah atau bahagian badan yang lain; ruam kulit, gatal-gatal atau gegata pada kulit, demam (*hay*

fever), atau anda mungkin berasa pitam.

Hipoglisemia:

- Paras gula darah rendah (hypoglycaemia) mungkin menjadi lebih teruk di kalangan orang yang sedang mengambil ubat lain untuk merawat diabetes, seperti *sulfonylurea* atau insulin.

Tanda-tanda paras gula darah rendah termasuk lemah, menggeletar atau menggigil, berpeluh, ringan kepala, sakit kepala, pening, degupan jantung yang cepat, kurang tumpuan, sebak atau menangis, mudah marah, lapar dan kebas di sekitar bibir dan jari. Jangan memandu kereta jika anda mempunyai tanda-tanda paras gula darah rendah.

Kesan berkaitan dengan kulit:

- Lepuh membentuk atau kulit anda memecah (*erosion*). Simptom-simptom ini berkemungkinan adalah tanda-tanda tindak balas kulit yang dipanggil *bullous pemphigoid* yang memerlukan rawatan di hospital.

Dehidrasi:

- Pengurangan volum (kehilangan cecair yang diperlukan dari badan; dehidrasi).

Jika anda tidak dapat menyimpan cecair dalam badan atau jika anda mengalami sebarang simptom kehilangan cecair badan yang terlalu banyak semasa mengambil SIDAPVIA: mulut berasa melekit dan kering, rasa dahaga yang lampau, cirit-birit atau muntah yang teruk, pening, atau membuang air kecil lebih kurang daripada biasa atau tidak membuang sama sekali.

Kesan berkaitan dengan jangkitan:

- Jangkitan genital (kemaluan). Jika anda mengalami kesakitan semasa membuang air kecil, rasa pedih dan kerengsaan yang lebih teruk atau kemerahan dan bengkak pada kemaluan anda, atau terdapat bau atau lelehan yang luar biasa pada kemaluan anda.
- Jangkitan saluran kencing. Jika anda mempunyai simptom-simptom seperti rasa pedih atau sakit apabila anda membuang air kecil, lebih kerap atau tidak dapat menahan membuang air kecil, demam, serum sejuk, atau darah dalam air kencing.
- Jika anda mengalami kesakitan atau kelemutan, kemerahan, bengkak pada kemaluan atau kawasan dari kemaluan ke rektum, demam, dan secara amnya berasa tidak sihat. Ini mungkin merupakan simptom-simptom sejenis jangkitan yang jarang berlaku tetapi serius dan berpotensi mengancam nyawa iaitu *Necrotising fasciitis* bahagian perineum perineum (*Fournier's gangrene*) dan anda memerlukan rawatan segera.

Ketoasidosis Diabetik:

- Dalam kes-kes yang jarang berlaku, *dapagliflozin* iaitu salah satu bahan aktif dalam SIDAPVIA, boleh menyebabkan keadaan serius yang dipanggil ketoasidosis diabetik.

Simptom-simptom ketoasidosis diabetik termasuk berasa sakit atau kesakitan, susah untuk bernafas, rasa dahaga yang lampau, rasa lemah and letih, kekeliruan, bau yang manis pada nafas anda, rasa manis-manis atau logam dalam mulut anda, bau yang berbeza pada air kencing atau peluh anda dan kerap membuang air kecil.

Risiko mendapat ketoasidosis diabetik mungkin meningkat

dalam keadaan puasa yang berpanjangan, pengambilan alkohol yang berlebihan, dehidrasi, pengurangan dos insulin secara mendadak, atau keperluan insulin yang lebih tinggi akibat pembedahan besar atau penyakit serius.

Ketoasidosis diabetik adalah keadaan yang boleh mengancam nyawa.

Pankreatitis:

- Sakit perut yang teruk dan berterusan, selalunya dengan loya dan muntah. Ini mungkin simptom-simptom pankreatitis.

Pankreatitis boleh menjadi masalah perubatan yang serius dan berpotensi mengancam nyawa.

Kesan berkaitan dengan buah pinggang:

- Masalah buah pinggang (kadang-kadang memerlukan dialisis)

Apa harus anda buat

Hubungi doktor anda dengan segera, atau pergi terus ke Jabatan Kecemasan di hospital terdekat jika anda mengalami sebarang kesan sampingan yang serius ini.

Beritahu doktor atau ahli farmasi anda jika anda perasan apa-apa lagi yang mungkin membuat anda berasa tidak sihat.

Kesan-kesan sampingan lain yang tidak disenaraikan di sini mungkin berlaku di kalangan sesetengah orang.

Anda boleh melaporkan sebarang kesan sampingan atau kesan advers ubat kepada Pusat Pemantauan Kesan Advers Ubat Kebangsaan melalui laman web npra.gov.my [Consumers → Reporting Side Effects to Medicines (ConSERF) or Vaccines (AEFI)].

Sentiasa pastikan anda berbincang dengan doktor atau ahli farmasi anda sebelum anda memutuskan untuk berhenti mengambil sebarang ubat anda.

Cara penyimpanan dan pelupusan SIDAPVIA

- Penyimpanan

- Simpan tablet SIDAPVIA anda di dalam pek papan lepuh sehingga tiba masa untuk anda mengambilnya. Jika anda mengeluarkan SIDAPVIA daripada pek papan lepuh, keadaan ubat tidak akan tahan dengan baik.
- Simpan ubat anda di tempat yang kering dan sejuk di mana suhu kekal di bawah suhu 30°C.

Ikut arahan pada karton untuk mengetahui cara menjaga ubat anda dengan betul.

Simpan di tempat yang kering dan sejuk, jauh dari kelembapan, haba atau cahaya matahari; sebagai contoh, jangan simpannya:

- dalam bilik mandi atau berhampiran sinki, atau
- di dalam kereta atau di ambang tingkap.

Simpan ubat di tempat yang tidak dapat dicapai oleh kanak-kanak kecil.

- Pelupusan

Jika anda tidak perlu lagi menggunakan ubat ini atau ubat anda sudah lapuk, tanya ahli farmasi anda tentang cara pelupusan ubat yang tertinggal.

Jangan gunakan ubat ini jika ia telah melepasi tarikh luputnya.

Maklumat lanjut

- Rupa dan warna produk

SIDAPVIA 10 mg/100 mg *film-coated* tablet adalah berwarna kuning, berbentuk bujur, saiz kira-kira 8 mm x 15 mm, dwicembung, tablet bersalut filem dengan cetakan tenggelam "F M" di satu sisi dan kosong di sisi yang satu lagi.

SIDAPVIA boleh didapati dalam pek papan lepuh berisi 7 atau 28 tablet. Tidak semua pek mungkin dipasarkan.

- Bahan-bahan kandungan

Bahan aktif:

- *Dapagliflozin* 10 mg
- *Sitagliptin* 100 mg

Bahan tidak aktif:

Teras tablet:

- *croscarmellose sodium*
- *crospovidone*
- *microcrystalline cellulose*
- *mannitol*
- *magnesium stearate*
- *calcium hydrogen phosphate*
- *sodium stearyl fumarate*

Salutan filem tablet:

- *polyvinyl alcohol*
- *titanium dioxide*
- *macrogol 3350*
- *talc*
- *iron oxide yellow*

Alergen yang berkemungkinan:

Tidak berkenaan

Jangan ambil ubat ini jika anda mempunyai alahan terhadap mana-mana bahan kandungan yang disenaraikan.

- Nombor MAL

MALxxxxxx

Pengilang

SK Chemicals Co, Ltd (1346)
149, Sandan-ro

Heungdeok-gu
Cheongju-si
Chungcheongbuk-do
Republik Korea

Pemegang Pendaftaran Produk

AstraZeneca Sdn. Bhd.
Level 11 & 12, The Bousteador
No. 10, Jalan PJU 7/6
Mutiar Damansara
47800 Petaling Jaya
Malaysia

Tarikh kemaskini RiMUP

30 Disember 2024
VV-RIM-07012919
(berdasarkan PI: VV-RIM-07012816)

Nombor siri

NPRA (R1) 24/024